

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA
Zakonodavno - pravna komisija

Broj: 02/2-02-1592/21
Sarajevo, 29.07.2021. godine

Na osnovu člana 56. Poslovnika o radu Doma naroda Parlamenta Federacije Bosne i Hercegovine, Zakonodavno-pravna komisija Doma naroda Parlamenta Federacije Bosne i Hercegovine, na 5. sjednici održanoj 29. jula .2021. godine, razmatrala je:

1. Prijedlog zakona o obrtu i srodnim djelatnostima u Federaciji Bosne i Hercegovine – hitni postupak,
2. Prijedlog zakona o izmjenama Zakona o poljoprivredi – skraćeni postupak,
3. Prijedlog zakona o dopunama Zakona o zaštiti od nasilja u porodici - skraćeni postupak,
4. Prijedlog zakona o posredovanju u prometu nekretnina,i
5. Prijedlog zakona o izmjenama i dopunama Zakona o privrednim društvima.

Na osnovu člana 51. Poslovnika o radu Doma naroda Parlamenta Federacije BiH, Komisija podnosi Domu naroda sljedeći

IZVJEŠTAJ

1. Prijedlog zakona o obrtu i srodnim djelatnostima u Federaciji Bosne i Hercegovine – hitni postupak

USTAVNI OSNOV – Ustavni osnov za donošenje ovog zakona sadržan je u odredbi člana III. 1. tačke d) Ustava Federacije Bosne i Hercegovine („Službene novine Federacije BiH“, broj: 1/94), koji je izmijenjen amandmanima VIII, LXXXIX, a u vezi sa članom IV.A.20. (1) Ustava Federacije Bosne i Hercegovine prema kojem je u isključivoj nadležnosti Federacije Bosne i Hercegovine utvrđivanje ekonomske politike, uključujući planiranje i obnovu, te politiku korištenja zemljišta na federalnom nivou, a Parlament Federacije, uz ostala ovlaštenja predviđena Ustavom, odgovoran je za donošenje zakona o vršenju funkcija federalne vlasti.

RAZLOZI ZA DONOŠENJE ZAKONA - Analiza stanja na tržištu i sagledavanje problema sa kojim se suočavaju obrtnici, nemogućnost izvoza, komplikovana i skupa registracija obrta, neusklađenost odredbi trenutnog Zakona sa pozitivnim zakonodavstvom, nemogućnost primjene pojedinih odredbi Zakona, kao i zbog potrebe smanjenja sive ekonomije, razlozi su donošenja novog Zakona. Višegodišnje iskustvo u primjeni Zakona o obrtu i srodnim djelatnostima Federacije Bosne i Hercegovine („Službene novine Federacije BiH“, br. 35/09 i 42/11) pokazalo je da zakonska rješenja utvrđena ovim zakonom imaju značajne manjkavosti, zbog čega se i pristupilo studioznoj analizi i izradi Prijedloga zakona o obrtu i srodnim djelatnostima u Federaciji BiH, po hitnoj proceduri, kao propisu koji će pored uspostavljanja i propisivanja načina obavljanja obrta sadržavati i odredbe o organizovanju i obrazovanju obrtnika, te nadležnostima obrtničke komore, kao i sve mjere koje su nezaobilazne kada je u pitanju obrtnička djelatnost. Obrtnici predstavljaju važan segment privrede u Federaciji BiH, te je Federalno ministarstvo razvoja, poduzetništva i obrta, kao obrađivač zakona, stanovišta da će predloženo zakonsko rješenje značajno doprinijeti unapređenju obrtničke djelatnosti, povećanju učinkovitosti sistema, boljoj koordinaciji općinskih, gradskih, kantonalnih i federalnih vlasti, svrsishodnijem trošenju sredstava,

smanjenju troškova fizičkim licima i povećanju zaposlenosti. Prijedlog zakona o obrtu i srodnim djelatnostima Federacije BiH sa predloženim zakonskim rješenjima ima za cilj da doprinese suzbijanju sive ekonomije i jačanju tržišta. Obrtnici su pokretač ekonomije i neophodno je osigurati moderan i efikasan okvir za njihovo poslovanje, te podsticati jačanje obavljanja obrtničke djelatnosti. Predviđenim rješenjima pojednostavljeni su postupci za registraciju i rad obrtnika u Federaciji BiH, čime bi se moglo ostvariti 500.000 konvertibilnih maraka ušteda privatnom sektoru na godišnjem nivou. Znatno je ubrzano provođenje procedura i postupaka obuhvaćenih ovim zakonom odnosno potrebno vrijeme je reducirano za 50%. Također, unaprijeđen je postupak razmjene informacija, te način popunjavanja Obrtnog registra.

OBRAZLOŽENJE PRIJEDLOGA ZA DONOŠENJE ZAKONA PO HITNOM POSTUPKU – Predloženo je da se Zakon o obrtu i srodnim djelatnostima u Federaciji Bosne i Hercegovine donese po hitnom postupku, u skladu sa članom 186. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03, 21/09 i 24/20), koji predviđa da se zakon može donijeti po hitnom postupku samo ako se tim zakonom uređuju odnosi i pitanja za čije uređivanje postoji neodložna potreba i ako bi donošenje zakona u redovnom postupku moglo izazvati štetne posljedice za Federaciju Bosne i Hercegovine. Izradi Prijedloga zakona o obrtu i srodnim djelatnostima u Federaciji Bosne i Hercegovine po hitnoj proceduri pristupilo se kako ne bi došlo do nenadoknadle materijalne štete po Federaciju BiH kao i zbog zaštite javnoga interesa.

Nakon uvodnog izlaganja vođena je rasprava u kojoj su učestvovali članovi Komisije, te donijeli sljedeći

ZAKLJUČAK

Članovi Komisije u općem pretresu su utvrdili da postoji ustavni osnov za donošenje i nemaju primjedbi na **Prijedlog zakona o obrtu i srodnim djelatnostima u Federaciji Bosne i Hercegovine – hitni postupak**, u domenu svoje nadležnosti, te predlažu Domu naroda da razmotri i usvoji **Prijedlog zakona o obrtu i srodnim djelatnostima u Federaciji Bosne i Hercegovine – hitni postupak**, u tekstu kako je to predložila Vlada Federacije BiH.

2. Prijedlog zakona o izmjenama Zakona o poljoprivredi – skraćeni postupak

USTAVNI OSNOV – Ustavni osnov za donošenje ovog Zakona sadržan je u odredbi tačke c.) Amandmana VIII na Ustav Federacije Bosne i Hercegovine, prema kojoj je u isključivoj nadležnosti Federacije utvrđivanje ekonomske politike, uključujući planiranje i obnovu, te politiku korištenja zemljišta na federalnom nivou.

RAZLOZI ZA DONOŠENJE ZAKONA – Zakon o poljoprivredi je objavljen u "Službenim novinama Federacije BiH" broj 88/07 i stupio na snagu 11.12.2007. godine. Zakon o poljoprivredi je krovni poljoprivredni zakon (Lex generalis), kojim se funkcionalno određuje šta je potrebno u poljoprivredi u Federaciji BiH te formalno-pravno objedinjuju i definišu osnovni sadržaji u području poljoprivrede, koji su nužno potrebni za provođenje ciljeva i mjera poljoprivredne politike. Do sada su izvršene izmjene i dopune manjeg obima ovog zakona u tri navrata. Planom rada Ministarstva i Vlade Federacije BiH je predviđeno da se pristupi izradi novog Zakona o poljoprivredi i novog Zakona o novčanim podrškama. Imajući u vidu da se radi o zakonima čija je priprema izuzetno složena radi usklađivanja sa regulativom EU za koje je u skladu sa važećim propisima neophodno uraditi i sveobuhvatnu procjenu uticaja, te provesti složeni postupak konsultacija i javnih rasprava jer će promjene

koje je potrebno napraviti, uticati na veći broj populacije (sve poljoprivredne proizvođače), nismo još završili postupak pripreme novog zakona. Radi toga je zaključeno da se što hitnije izvrše izmjene ovog zakona u određenim segmentima, kako bi se osiguralo usaglašavanje sa Zakonom o razvojnom planiranju i upravljanju razvojem u Federaciji Bosne i Hercegovine („Službene novine Federacije BiH”, broj 32/17) i Uredbom o izradi strateških dokumenata u Federaciji Bosne i Hercegovine („Službene novine Federacije BiH”, br. 74/19 i 2/21) vezano za izradu poljoprivredne strategije. Istovremeno smo izvršili i izmjene poziva na propise koji su u međuvremenu izmijenjeni (promjene naziva zakona odnosno broja Službenih novina Federacije BiH u kojima su isti objavljeni). Izvršeno je i usaglašavanje sa novim Zakonom o inspekcijama Federacije BiH („Službene novine Federacije BiH”, broj 73/14).

OBRAZLOŽENJE PRIJEDLOGA ZA DONOŠENJE ZAKONA PO SKRAĆENOM POSTUPKU - Odredbama člana 164. stav 1. Poslovnika o radu Doma naroda Parlamenta Federacije Bosne i Hercegovine propisano je da kada je to programom rada Doma naroda predviđeno ili kada nije u pitanju složen i obiman zakon, podnosilac prijedloga zakona može umjesto nacрта podnijeti prijedlog zakona i predložiti da se o prijedlogu zakona raspravlja po skraćenom postupku bez nacрта zakona. U postupku izmjena ovog zakona, je sprovedena skraćena procjena uticaja propisa (RIA) jer se radi o izmjenama manjeg obima koje su vezane za usklađivanje sa odredbama Zakona o razvojnom planiranju i upravljanju razvojem u Federaciji Bosne i Hercegovine vezano za segment donošenja sektorske strategije kao i usklađivanje sa Zakonom o inspekcijama te druge manje izmjene koje ne utiču na sam sadržaj predloženih zakonskih rješenja u važećem zakonu u suštini, već su izmjene formalno-pravne prirode. Imajući u vidu da se radi o izmjenama manjeg obima, i da zakon nije obiman i složen, te da ispunjava kriterije propisane članom 164. stav 1. Poslovnika o radu Doma naroda Parlamenta Federacije Bosne i Hercegovine, predlaže se da se razmatra po skraćenom postupku.

Nakon uvodnog izlaganja vođena je rasprava u kojoj su učestvovali članovi Komisije, te donijeli sljedeći

ZAKLJUČAK

Članovi Komisije u općem pretresu su utvrdili da postoji ustavni osnov za donošenje i nemaju primjedbi na **Prijedlog zakona o izmjenama Zakona o poljoprivredi – skraćeni postupak**, u domenu svoje nadležnosti, te predlažu Domu naroda da razmotri i usvoji **Prijedlog zakona o izmjenama Zakona o poljoprivredi – skraćeni postupak**, u tekstu kako je to predložila Vlada Federacije BiH.

3. Prijedlog zakona o dopunama Zakona o zaštiti od nasilja u porodici - skraćeni postupak

USTAVNI OSNOV – Ustavni osnov za donošenje navedenog zakona sadržan je u odredbi člana IV.C.3. Ustava Federacije Bosne i Hercegovine, kojom je predviđeno da pravila postupka koja su potrebna da se osigura jednakost u postupanju, kao i osnovni principi pravičnosti u postupcima pred sudovima uredit će se zakonima Federacije. Polazeći od činjenice da se ovim zakonom uređuju pravila postupka zaštite žrtve od nasilja u porodici u Federaciji navedena ustavna odredba predstavlja ustavni osnov za njegovo donošenje, pa je na osnovu člana IV.A.20.(1) d) Ustava Federacije, Parlament Federacije Bosne i Hercegovine nadležan za donošenje ovog zakona.

RAZLOZI ZA DONOŠENJE ZAKONA- Osnovni razlog za donošenje ovog zakona jeste unaprjeđenje normativnog okvira kojim je uređen postupak zaštite žrtve od nasilja u porodici i to na način da se u cilju zaštite žrtve uvodi novi institut „osoba od povjerenja“. Federalno ministarstvo pravde je uvažavajući inicijativu Centra ženskih prava Zenica, broj 1-435/20 od 13.10.2020. godine, pripremlilo Nacrt zakona o dopunama Zakona o zaštiti od nasilja u

porodici. Praćenje efikasnosti primjene zakonodavstva koje uređuje pitanje procesuiranja slučajeva nasilja u porodici u praksi, u Federaciji Bosne i Hercegovine, s posebnim fokusom na pitanje položaja i zaštite žrtve nasilja, pokazalo je niz slabosti koje ukazuju, između ostalog, na potrebu intervencije i u zakonodavstvu. Specifičnost zakonodavnog uređenja ovog pitanja koja se manifestira u činjenici da procesuiranje počinioca krivičnog djela „nasilje u porodici“ koje je definisano u članu 222. Krivičnog zakona Federacije Bosne i Hercegovine se sprovodi prema odredbama Zakona o krivičnom postupku Federacije Bosne i Hercegovine, dok su mjere koje se mogu izreći nasilnoj osobi i procedura za njihovo izricanje propisane Zakonom o zaštiti od nasilja u porodici. Pored postupaka za utvrđivanje odgovornosti nasilne osobe, žrtva se u cilju ostvarivanja svojih prava pojavljuje i u postupcima pred različitim organima kao što su centri za socijalni rad, zdravstvene ustanove i dr. U svim ovim postupcima žrtva je sama, bez podrške i/ili pravne pomoći, nema status stranke u postupku i često je izložena dodatnoj traumi. Ovo otvara pitanje koliko je uspostavljeni sistem osigurao pravičnost postupka, posebno, s obzirom na prava koja su osigurana osumnjičenoj/optuženoj osobi i koliko je usklađen sa međunarodnim standardima. Komparativno mapiranje zakonodavstva vezano za položaj žrtve u slučajevima nasilja u porodici u odnosu na neke zemlje regiona (Hrvatska i Crna Gora) koje je sproveo Centar ženskih prava Zenica pokazuje da su navedene zemlje u cilju izvršavanja međunarodnih obaveza, uključujući i obaveze iz Istanbulske konvencije izmjenile svoje zakonodavstvo i uvele institut „osobe od povjerenja“, s tim što su odabrani različiti pristupi. Republika Hrvatska se odlučila za sveobuhvatan model reforme relevantnog zakonodavstva kojim se uređuju pitanje žrtve, a u cilju njegovog usklađivanja sa Direktivom 2012/29/EU o uspostavi minimalnih standarda, prava, podrške i zaštite žrtava zločina (Direktiva EU). Reforma je uključivala izmjene i dopune Zakona o kaznenom postupku i Zakona o zaštiti od nasilja u obitelji. Republika Crna Gora je izvršila samo izmjene i dopune Zakona o zaštiti od nasilja u porodici. Specifičnost nasilja u porodici, a posebno evidentni problemi u praksi, vezani za njegovo procesuiranje, ukazuju na potrebu urgentnog djelovanja kako bi se osigurala barem podrška žrtvi kroz izmjene i dopune Zakona o zaštiti od nasilja u porodici, na način da se izvrši uvođenje instituta „osoba od povjerenja“. Ovo je posebno važno s obzirom na činjenicu da nasilje u porodici često ima obilježja i nasilja na osnovu spola, što dodatno ukazuje na potrebu da se žrtvi osigura podrška u toku postupka. Potreba osiguranja podrške žrtvi se nameće kao imperativ. Izmjenama i dopunama Zakona o zaštiti od nasilja u porodici kroz uvođenje instituta „osobe od povjerenja“ omogućile bi se konkretne mjere kojima bi se ojačao položaj žrtve nasilja u porodici, osiguravanjem da su njena prava i interesi dosljedno i adekvatno predstavljeni i uzeti u obzir u svim fazama i kroz sve institucionalne i vaninstitucionalne mehanizme zaštite. Učvršćivanje položaja žrtve nasilja podrazumijeva predviđanje konkretnih i efikasnih mjera zaštite kojima će se osigurati da su njihova prava i interesi pisano predstavljeni u okviru sudskih postupaka.

OBRAZLOŽENJE PRIJEDLOGA ZA DONOŠENJE ZAKONA PO SKRAĆENOM POSTUPKU - Odredbama člana 164. stav 1. Poslovnika o radu Doma naroda Parlamenta Federacije Bosne i Hercegovine propisano je da kada je to programom rada Doma naroda predviđeno ili kada nije u pitanju složen i obiman zakon, podnosilac prijedloga zakona može umjesto nacрта podnijeti prijedlog zakona i predložiti da se o prijedlogu zakona raspravlja po skraćenom postupku bez nacрта zakona. Kao osnovni razlog za donošenje ovoga zakona po skraćenom postupku ističe se da se u konkretnom slučaju ne radi o složenom i obimnom zakonu.

Nakon uvodnog izlaganja vođena je rasprava u kojoj su učestvovali članovi Komisije, te donijeli sljedeći

ZAKLJUČAK

Članovi Komisije u općem pretresu su utvrdili da postoji ustavni osnov za donošenje i nemaju primjedbi na **Prijedlog zakona o dopunama Zakona o zaštiti od nasilja u porodici - skraćeni postupak**, u domenu svoje nadležnosti, te predlažu Domu naroda da razmotri i usvoji **Prijedlog zakona o dopunama Zakona o zaštiti od nasilja u porodici - skraćeni postupak**, u tekstu kako je to predložila Vlada Federacije BiH.

4. Prijedlog zakona o posredovanju u prometu nekretnina

USTAVNI OSNOV- Ustavni osnov za donošenje Zakona o posredovanju u prometu nekretnina sadržan je u članu III.1.tačka b) koji je izmijenjen amandmanima VIII., LXXXIC. i CVI., i članu IV.A.20.(1) d) Ustava Federacije Bosne i Hercegovine prema kojima je u isključivoj nadležnosti Federacije Bosne i Hercegovine, između ostalog, utvrđivanje ekonomske politike.

RAZLOZI ZA DONOŠENJE ZAKONA- Vlada Federacije BiH je kroz Reformsku agendu za period 2015. – 2018. godine kao strateški prioritet identifikovala intenziviranje privrednog razvoja i jačanje unutrašnje društvene stabilnosti Federacije BiH, kao i iniciranje i provođenje reformi usklađenih sa potrebama Bosne i Hercegovine na putu ka pridruživanju Evropskoj uniji. U skladu sa postavljenim ciljevima u oblasti uređenja unutrašnjeg tržišta, zaštite fer konkurencije i zaštite potrošača neophodno je usvojiti evropske standarde i u oblasti posredovanja u prometu nekretnina. Uređenje ove oblasti je nužno, s obzirom da je uspostavljanjem tržišnih odnosa i dokidanjem društvenog vlasništva u Federaciji BiH oživjelo tržište nekretnina što je uticalo na pojavu velikog broja posrednika u prometu nekretninama. Nepostojanje pravne regulative pogoduje pojavi sve većeg broja lica koja posluju ne pridržavajući se pravila struke i koji nelegalnim radnjama nanose direktnu štetu klijentima, a posredno i cijeloj struci. Trgovina nekretninama suočena je s problemom nepošteno tržišne konkurencije i sive ekonomije, needuciranošću posrednika u prometu nekretnina, izbjegavanjem plaćanja naknada državi, nezaštićenošću kupaca i prodavca nekretnina, nedostatkom dobrih poslovnih običaja i kontrolnih mehanizama većine posrednika u prometu nekretnina. Upravo stoga nameće se i potreba zakonskog uređenja ove oblasti kako bi se pri predmetnom poslovanju građanima, potrošačima pružila bolja, profesionalnija i kvalitetnija usluga, po uzoru na poslovanje agencija zemalja s uređenim tržištem, te ujedno uvelo i više reda u područje te djelatnosti.

Nakon uvodnog izlaganja vođena je rasprava u kojoj su učestvovali predsjednik i članovi Komisije, te donijeli sljedeći

ZAKLJUČAK

Članovi Komisije u općem pretresu su utvrdili da postoji ustavni osnov za donošenje i nemaju primjedbi na **Prijedlog zakona o posredovanju u prometu nekretnina**, u domenu svoje nadležnosti, te predlažu Domu naroda da razmotri i usvoji **Prijedlog zakona o posredovanju u prometu nekretnina**, u tekstu kako je to predložila Vlada Federacije BiH.

5. Prijedlog zakona o izmjenama i dopunama Zakona o privrednim društvima

USTAVNI OSNOV- Ustavni osnov za donošenje ovog zakona sadržan je u odredbi člana III. 1. tačka b.), koja je izmijenjena amandmanima VIII, LXXXIX i CVI i članu IV. A. 20. (1) d)

Ustava Federacije Bosne i Hercegovine prema kojoj je u isključivoj nadležnosti Federacije Bosne i Hercegovine utvrđivanje ekonomske politike, a Parlament Federacije Bosne i Hercegovine, uz ostala ovlaštenja predviđena Ustavom Federacije Bosne i Hercegovine, odgovoran je za donošenje zakona o vršenju dužnosti federalne vlasti.

RAZLOZI ZA DONOŠENJE ZAKONA - Zakon o privrednim društvima Federacije Bosne i Hercegovine („Službene novine Federacije BiH“, broj 81/15) usvojen je kao strateški prioritet u svrhu jačanja privrednog razvoja, domaćeg tržišta i uklanjanju administrativnih barijera u poslovanju. Usvajanjem ovog zakona poduzete su snažne mjere na smanjenju opterećenja privrednim subjektima, te je kreiran okvir za primjenu novih standarda korporativnog upravljanja i njihovo praćenje. Usvajanjem Reformske agende od strane Vlade Federacije Bosne i Hercegovine, identificirane su dalje aktivnosti usmjerene ka nastavku usklađivanja poslovnog okruženja i jačanju jedinstvenog ekonomskog prostora u Bosni i Hercegovini. U svrhu ostvarenja cilja iz Akcionog plana za provođenje Reformske agende, kojim se predviđa pojednostavljenje registracije poslovnih subjekata u Federaciji Bosne i Hercegovine, Vlada Federacije Bosne i Hercegovine se opredijelila za uspostavljanje jednošalterskog sistema registracije poslovnih subjekata. S tim u vezi je uspostavljena i inter-resorna radna grupa čiji je mandat analiza stanja, kreiranje i implementacija preporuka za uspostavljanje ovog sistema, uz podršku Britanske ambasade i Grupacije Svjetske banke. U proteklom periodu je pripremljena i analiza postojećeg stanja u okviru koje su identificirani propisi koje je neophodno mijenjati kako bi se omogućilo uspostavljanje jednošalterskog sistema registracije. Između ostalog, identifikovana je i potreba za doradom pojedinih odredbi Zakona o privrednim društvima u dijelu koji se odnosi na društva sa ograničenom odgovornosti. Akcenat se stavlja, između ostalog na poslovno okruženje pri čemu je cilj privlačenje što većeg broja investicija, kako domaćih, tako i stranih, a kojima će se podržati srednjoročni ekonomski rast. Vlada Federacije Bosne i Hercegovine je opredjeljena da nastavi ulagati napore s ciljem pojednostavljenja postupaka i jačanja transparentnosti u ovoj oblasti. Imajući u vidu potrebu da se postupak upisa poslovnih subjekata u Registar društva ubrza, da se koraci pojednostave, te da se omogućiti podnošenje zahtjeva za registraciju elektronskim putem, kreiranjem jednošalterskog sistema, predlažu se u ovom zakonu određene izmjene i dopune kako bi se uskladio sa izmjenama i dopunama Zakona o registraciji poslovnih subjekata Federacije Bosne i Hercegovine. Ovako značajne novine u procesnom zakonu, neminovno su nametnule potrebu izmjena u materijalnom zakonu, kako u praksi ne bi dolazilo do sukoba normi, i eventualnih problema u provedbi odredbi Zakona o privrednim društvima. Nacrt zakona o izmjenama i dopunama Zakona o privrednim društvima razmatran je i zaključkom prihvaćen u Parlamentu Federacije Bosne i Hercegovine i to u Predstavničkom domu na 30. vanrednoj sjednici održanoj 21.06.2018. godine i Domu naroda na nastavku 5. sjednice održane 27.02.2020. godine.

Nakon uvodnog izlaganja vođena je rasprava u kojoj su učestvovali članovi Komisije, te donijeli sljedeći

ZAKLJUČAK

Članovi Komisije u općem pretresu su utvrdili da postoji ustavni osnov za donošenje i nemaju primjedbi na **Prijedlog zakona o izmjenama i dopunama Zakona o privrednim društvima**, u domenu svoje nadležnosti, te predlažu Domu naroda da razmotri i usvoji **Prijedlog zakona o izmjenama i dopunama Zakona o privrednim društvima**, u tekstu kako je to predložila Vlada Federacije BiH.

Za izvjestioca na sjednici Doma naroda ispred Zakonodavno-pravne komisije, određena je Zdenka Džambas, zamjenica predsjednika Komisije.

ZAMJENICA PREDSJEDNIKA KOMISIJE

Zdenka Džambas